




官常典第五百八十卷

節使部名臣列傳三十二

明四 賈應春

按明外史本傳應春字東陽真定人嘉靖二年進士授南陽知縣遷和州知州入爲刑部郎中歷知潞安開封二府遷陝西副使未赴河南巡按陳蕙劾其貪濫謫山東鹽運同知蕙亦坐貶久之由漢陽知府復遷陝西副使進右參政寧羌賊起會兵討平之遷按察使左右布政使皆在陝西就拜右副都御史巡撫其地三十二年進兵部右侍郎總督三邊軍務俺荅諸部歲擾邊應春言諸邊間諜不通每寇入莫測所向我則無所不備兵分勢孤往往失事夫寇將內犯必聚衆治器腊肉飼馬傳箭祭旗其形先露而我民被掠者間亦臨邊傳報頗有左驗使邊臣厚以官賞令密偵候視漫然散守者功相十百乃定賞格以請帝立從之其秋寇大入延綏殺掠五千餘人應春督諸將邀擊獲首功二百四十以捷聞而巡按御史吉澄極言敗狀帝竟錄應春功官其一子明年以宣大總督蘇祐衰老命以應春代時秋防將屆代應春者江東未至令仍舊任套寇數萬人屯寧夏山後先遣騎五

古今圖書集成
百餘入掠總兵官姜應熊守紅井以綴敵而密遣精兵薄其營斬首百四十餘級進應春右都御史
踰月寇別部入永昌西寧爲守將所破番人入鎮羌總兵官王繼祖擊敗之竝賜應春銀幣久之寇
五千騎犯環慶爲都督袁正所破掠莊涼守將邀斬百二十人再予應春一子官在鎮數載築邊垣
萬一千八百餘丈以花馬池閒田二萬頃給軍屯墾邊人賴之徵拜南京戶部尙書論邊垣功進秩
一等旋召爲刑部尙書改戶部國用不足應春以爲言因命徵不及七分者所司毋遷官漕政弛廢
運艘多違貢亦以應春言重其罰歲餘致仕去卒贈太子太保

趙炳然

按明外史本傳炳然字子晦劍州人嘉靖十四年進士除新喻知縣徵拜御史與給事中李文進覈
宣大山西兵餉劾前後督撫樊繼祖史道監司楊銳指揮馮世彪等一百七十七人侵冒罪坐謫有
差條上備邊十二事歷按雲南浙江擢大理寺丞進少卿尋改右僉都御史巡撫湖廣進左副都御
史協理院事浙江福建總督胡宗憲下獄詔罷總督毋設大學士徐階以浙江寇甫平請設巡撫綏
輯遂進炳然兵部右侍郎兼右僉都御史往任之浙罹兵燹久又當宗憲汰侈之後財匱力絀炳然

廉以率下悉更諸政令不便者仍奏減軍需之半民皆尸祝之福建巡撫游震得請浙兵勦賊詔發義烏精兵一萬命副總兵戚繼光將以往仍諭炳然協勦炳然言福建所以致亂者由將吏撫馭無術民變爲兵兵變爲盜其由來漸也今又驅浙兵以赴閩急竊懼浙之復爲閩也請令一意團練土著使人各爲用家自爲守急則兵緩則農然後聚散兩有所歸卽不得已而召募亦必先本土後鄰壤庶無釀禍本又條上防海八事中言蘇松浙江水師皆統於總兵駐定海陸師皆統於副總兵駐金山衛竝受總督節制今督府旣革則已判爲二鎮彼此牽制不得調發請畫地分轄各兼水陸軍務俱報可其年繼光破賊平海餘寇流入浙江官軍迎戰於連嶼陡橋石坪斬首百餘級新倭復犯石坪將士乘勝殲之炳然以援勦功再賜金幣進右都御史兼兵部右侍郎給事中辛自修劾罷戎政都御史李鑑請擇素知兵者代之乃召炳然爲兵部尙書協理戎政踰年詔兼右都御史總督宣大山西軍務新平平遠保平三堡密邇宣府舊屬大同天成相去六十里孤懸塞外隔崇山寇騎時出沒炳然慮其不守奏添設參將別爲一營詔如所請尋以總兵官馬芳等却敵功被賁已召還部代楊博爲尙書考滿加太子少保炳然清勤練達所至有聲績隆慶初以病乞休去卒贈太子太保

古今圖書集成
諡恭襄

伍文定

按明外史本傳文定字時泰松滋人父琇貴州參議文定舉弘治十二年進士有膂力便弓馬議論慷慨不能下人授常州推官精敏善決獄稱強吏魏國公徐備與民爭田文定勘歸之民劉瑾入備重賄興大獄巡撫艾樸以下十四人悉被逮文定已遷成都同知亦下詔獄斥爲民瑾敗起補嘉興江西姚源賊王浩八等流劫浙江開化都御史俞諫檄文定與參將李隆都指揮江洪僉事儲珊討之軍華埠而都指揮白弘與湖州知府黃衷別營馬金賊黨劉昌三破執弘官軍大挫浩八突華埠洪文定擊敗之追及於孔埠隆珊亦追至地淮破其巢進攻淫田洪以奇兵深入中賊誘與指揮張琳等皆被執文定等殿後得還賊亦遁歸江西諫等上文定忠勇狀詔所司獎勞擢河南知府計擒劇賊張勇李文簡以才任治劇調吉安討平永豐及大茅山賊已佐王守仁平桶岡橫水宸濠反吉安士民爭亡匿文定斬亡者一人衆乃定乃迎巡撫守仁入城邢珣徐璉戴德孺等先後至共討賊文定爲渠帥賊平功最擢江西按察使張忠許泰至南昌欲冒其功而守仁已俘宸濠赴浙江忠等

失望大恨文定出謁遂縛之文定罵曰吾不恤九族爲國家平大賊何罪汝天子腹心屈辱忠義爲逆賊報讎法當斬忠益怒椎文定仆地文定求解任不報尋遷廣東右布政使未赴而世宗嗣位文定列上忠等罪狀且曰曩忠泰與劉暉至江西忠自稱天子弟暉稱天子兒泰稱威武副將軍與天子同僚折辱命吏誣害良民需求萬端漁獵盈百萬脂膏罄盡乃始旋師致餓殍遍野盜賊縱橫雖寸斬三人不足謝江西百姓今大憝江彬錢寧皆已伏法三人實其黨與乞速正天誅用章國典又請發宸濠貲財還之江西以資經費矜釋忠泰所陷無辜及寧府宗人不預謀者以清冤獄帝竝嘉納之論功進右副都御史提督操江嘉靖三年討獲海賊董效等二百餘人賜勅獎勞尋謝病歸六年召拜兵部右侍郎其冬擢右都御史代胡世寧掌院事雲南土酋安銓反敗參政黃昭道攻陷尋甸嵩明明年武定土酋鳳朝文亦反殺同知以下官與銓合兵圍雲南詔進文定兵部尙書兼前職提督雲南四川貴州湖廣軍務討之以侍郎梁材督餉會芒部叛酋沙保子普奴爲亂并以屬文定文定未至雲南銓等已爲巡撫歐陽重所破遂移師征普奴左都御史李承勛極言川貴殘破不當用兵詆文定失計遂召還命提督京營文定至湖廣疏乞省祭歸已四川巡按御史戴金上言叛酋

稱亂之初勢尙可撫而文定決意進兵一無顧惜師旅窮於川貴軍聲震於楚滇飛芻輓糧糜數十萬及有詔罷師尙不肯已又極論土酋阿濟等罪軍民訛言幾復生變臣愚以爲文定可罪也尙書方獻夫李承勛因詆文定好大喜功傷財動衆乃令致仕文定忠義自許遇事敢爲不與時俯仰亡部之役憤小醜數亂欲爲國伸威爲議者旁撓廟堂專務姑息以故功不克就久之卒於家天啟初追諡忠襄

姚鏌

按明外史本傳鏌字英之慈谿人弘治六年進士除禮部主事進員外郎擢廣西提學僉事立宣成書院延五經師以教士子桂人祀山魘卓旺鏌毀像俗遂變遷福建副使未幾改督學政正德九年擢貴州按察使十五年拜右副都御史巡撫延綏上邊務六事皆議行嘉靖元年吉囊入涇陽鏌遣遊擊彭模出西路釋指揮卜雲於獄使副之夜半邀擊斬其二將乃遁璽書褒諭尋召爲工部右侍郎出督漕運改兵部右侍郎五年遷右都御史提督兩廣軍務兼巡撫田州土官岑猛謀不軌鏌令都指揮沈希儀結猛婦翁岑璋共圖猛調永順保靖兵使希儀與張經李璋張佑程鑒各統兵八萬

分道討而鎬與總兵官朱麒等攻破定羅丹梁猛子邦彥以勁兵守工堯隘璋倖以兵千助邦彥比官軍攻千人呼曰兵敗矣潰邦彥兵亦潰官軍大破之斬邦彥猛奔歸順璋誘而酖殺之斬首以獻詔進鎬左都御史加太子太保任一子官諸將進秩有差鎬請改設流官陳善後七事制可乃命參議汪必東僉事申惠與參將張經以兵萬人鎮其地必東惠甫至猛黨盧蘇王受等詐言猛不死借交趾兵二十萬且至夷民信之蘇等薄城經突圍走城遂陷王受亦攻入思恩府巡按御史石金劾鎬失策罔上竝論前總督盛應期帝以鎬有功許便宜撫勦蘇受數求赦鎬不許將大討之會廷議起王守仁督兩廣軍令鎬與同事鎬引疾乞罷帝曰姚鎬不去王守仁不來許馳驛歸初廣東提學道魏校毀諸寺觀田數千畝盡入霍韜方獻夫諸家鎬至廣追還之官韜獻夫恨甚與張璁桂萼合排鎬謂大同當征而反撫田州當撫而反征皆費宏謀國不臧釀成南北患時宏雖去猶借鎬以排之也鎬既得請方候代于夫長韋貫徐伍攻復思恩鎬上其狀詔先賞貫等而以撫勦事宜俟守仁處置既而鎬奏辯石金前疏詆金阻撓養寇金亦再疏詆鎬帝先入璁等言落鎬職閒住後蘇受既撫復叛帝漸思鎬十三年三邊關總制大學士費宏李時同召對宏薦鎬時亦言鎬處田州事賢於

王守仁帝曰然守仁虛名耳遂命以兵部尙書總制三邊軍務未赴宏卒鏢辭帝不悅仍落職閒住鏢旣罷薦者至二十疏不用家居數年卒

陳九疇

按明外史本傳九疇字禹學曹州人倜儻多權略自爲諸生卽習武事弘治十五年舉進士除刑部主事有重囚越獄人莫敢撓九疇挺槩逐得之遂以武健名正德初錄囚南畿忤劉瑾謫陽山知縣瑾敗復故官歷郎中遷肅州兵備副使總督彭澤之賂土魯番也遣哈密都督寫亦虎仙往九疇奮曰彭公受天子命制邊疆不能身當利害何但模稜爲乃練卒伍繕營壘常若臨大敵寫亦虎仙果通賊番會速壇滿速兒犯嘉峪關游擊芮寧敗死尋復遣斬巴思等以駝馬乞和而陰遺書虎仙及其姻黨阿刺思罕兒失拜烟答等俾內應九疇知賊計執阿刺思罕兒及斬巴思付獄通事毛鑑等守之鑑等故與通欲縱去衆番皆伺隙爲變九疇覺之僂鑑等賊失內應遂拔帳走兵部尙書王瓊惡澤并坐九疇失事罪逮繫法司獄以失拜烟答繫死爲罪除其名世宗卽位起故官俄進陝西按察使居數月甘肅總兵官李隆嗾部卒毆殺巡撫許銘焚其屍乃擢九疇右僉都御史巡撫甘肅而

按驗銘事誅隆及亂卒首事者九疇抵鎮言額軍七萬餘存者不及半且多老弱請令召募詔可嘉靖三年速壇滿速兒復以二萬餘騎圍肅州九疇自甘州晝夜馳入城射賊賊多死已又出兵擊走之其分掠甘州者亦爲總兵官姜瓖所敗論功進副都御史資金幣九疇上言番賊敢入犯者以我納其朝貢縱商販使得稔虛實也寫亦虎仙逆謀已露輸資權門轉蒙寵幸以犯邊之寇爲來享之賓邊臣怵利害拱手聽命致內屬番人勾連接引以至於今今卽不能如漢武興大宛之師亦當效光武絕西域之計先後入貢未歸者二百人宜安置兩粵其謀逆有迹者加之刑僇則賊內無所恃必不復有侵軼倘更包含隱忍恐河西十五衛所永無息肩之期也事下總制楊一清頗採其議四年春致仕歸初土魯番敗遁都指揮王輔言速壇滿速兒及牙木蘭俱死於砲九疇以聞後二人上表求通貢帝怪且疑而番人先在京師者爲蜚語言肅州之圍由九疇激之帝益信會百戶王邦奇許楊廷和彭澤詞連九疇吏部尙書桂萼等欲緣九疇以傾澤因請許通貢而追治九疇激變狀大學士一清言事已前決帝不聽逮下詔獄刑部尙書胡世寧言於朝曰世寧司刑而殺忠臣寧殺世寧乃上疏爲訟寃曰番人變詐妄騰謗欲害我謀臣耳夫其蓄謀內寇爲日已久一旦擁兵深入

古今圖書集成
諸番約內應非九疇先幾奮僂且近遣屬驛却其營帳遠交瓦剌擾其窟巢使彼內顧而返則肅州孤城豈復能保臣以爲文臣之有勇知兵忘身殉國者無如九疇宜番人深忌而欲殺也惟聽部下卒妄報以滿速兒等爲已死則其罪有不免耳已法司具獄亦如世寧言帝卒中夢等言謫戍極邊居十年赦還

蔡天祐

按明外史本傳天祐字成之睢州人父晟濟南知府以廉惠聞天祐舉弘治末進士改庶吉士授吏科給事中出爲福建僉事歷山東副使分巡遼陽歲歉活饑民萬餘闢濱海圩田數萬頃民名之曰蔡公田累遷山西按察使大同兵亂巡撫張文錦遇害詔曲赦亂卒擢天祐右僉都御史代之天祐從數騎馳入城諭軍士獻首惡衆心稍定會尙書金獻民總兵官杭雄出師甘肅道大同亂卒疑見討復鼓譟天祐懼急請再赦兵部言元惡不除無以警後請特遣大臣總督宣大軍務以制其變乃命戶部侍郎胡瓚偕都督魯綱統京軍三千人以往瓚等未發而進士李枝齋餉銀至亂卒曰此承密詔盡殺大同人爲軍犒也夜中火起圍枝館出牒示之乃解尋復殺知縣王文昌圍代王府脅王

奏乞赦王急攜二郡王走宣府巡按御史王官言亂卒方囂大帥兵壓境是趣之叛也請亟止禁軍容臣密圖乃命瓚駐兵宣府頃之天祐奏總兵官桂勇已捕五十四人請止京軍勿遣帝責以阻撓令必獲首惡郭鑑等既而瓚次陽和勇天祐令千戶苗登擒斬鑑等十一人函首送瓚請班師甫二日鑑父郭庖子復糾徐甄兒等夜殺勇家人又燬苗登家瓚言非盡殲不可帝乃切讓天祐召勇還京以故總兵朱振代之敕瓚仍駐宣府居無何天祐捕戮徐甄兒等瓚等遂班師明年正月侍郎李昆孟春總兵官馬永交章言庖子潛逃塞外必爲後患帝將遣使勘會瓚還京言逃卒無足患帝乃罷勘官勿遣庖子復潛入城夜焚振第明旦天祐閉城大索獲庖子及其黨三十四人悉斬以徇盡宥脅從人心乃大定事聞賚銀幣已進副都御史巡撫如故尋就進兵部右侍郎久之召還部天祐以藩祿久缺又歲當繕邊垣用便宜增淮鹽引價每引萬加銀五千被許帝宥之至是御史李宗樞復追論前事天祐因引疾去居二年奉詔起用未至京得疾告歸卒天祐有才智兵變時左右皆賊耳目幕府動靜悉知之天祐廣招星卜藝士往來軍中因具得其情卒賴以成功在鎮七年威德大著父老爲立安輯祠

張文錦

按明外史本傳文錦安丘人弘治十二年進士授戶部主事正德初爲劉瑾所陷逮繫詔獄斥爲民瑾誅起故官再遷郎中督稅陝西條上籌邊裕民十事遷安慶知府度寧王宸濠必反與都指揮楊銳爲禦備計宸濠果反浮江下文錦等慮其攻南都令軍士登城詬之宸濠乃留攻卒不能克事具楊銳傳璽書褒美擢太僕少卿嘉靖元年拜右副都御史巡撫大同劾守備中官李睿不法治其爪牙文錦性剛以拒賊得重名遂銳意振刷操切頗無序大同北四望平衍寇至無可禦文錦曰寇犯宣府不能近鎮城者以萬谷白陽諸堡爲外蔽也今城外卽戰場何以示重議於城北九十里外增設五堡曰水口宣寧只河柳溝樺溝參將賈鑑督役嚴卒已怨及堡成庫薄甚欲徙鎮卒二千五百家戍之衆憚行請募新丁不聽總兵官江桓太監王覲咸爲言文錦怒曰如此則令不行矣鎮親兵先往孰敢後親兵素游惰有室聞當發大恐請子身往得分番又不聽嚴趣之鑑承風杖其隊長諸邊卒自甘州五衛殺巡撫許銘朝廷處之輕頗無忌至是卒郭鑑柳忠等乘衆憤遂倡亂殺鑑裂其屍走出塞屯焦山墩文錦恐與外寇連令副將時陳等招之入城卽索治首亂者郭鑑等大懼復聚

爲亂焚大同府門入行都司縱獄囚又焚都御史府門文錦踰垣走匿博野王府諸亂卒欲燔王宮王懼出文錦郭鑑等殺之亦裂其屍遂焚鎮守總兵公署桓觀等皆走免乃出故總兵朱振於獄脅爲帥時嘉靖三年八月也事聞帝命侍郎李昆赦亂卒昆言文錦築堡爲國家建不拔功今骨髮暴露妻子流離行道皆流涕惟陛下哀恤不報久之文錦父政訟其子守安慶功乞加卹典禮部爲之請終不許文錦妻李氏復上疏訟寃帝怒命執齋疏者治之副都御史陳洪謨上言文錦僨事朝廷戮之可也假手士卒傳之四方損國威不小復降旨詰責自是廷臣不敢言萬曆中始贈右都御史天啟初追諡忠愍

詹榮

按明外史本傳榮字仁甫山海衛人嘉靖五年進士授戶部主事歷郎中督餉大同值兵變殺總兵官李瑾總督劉源清率師圍城久不下榮素有智略善應變叛卒掠城中無犯榮者外圍益急榮密約都指揮紀振遊擊戴濂鎮撫王寧同盟討賊察叛卒馬昇楊麟無逆志乃陽令寧持官民狀詣源清所爲叛卒乞原而陰以榮謀告請宥昇麟死昇三千金俾募死士自効會源清已罷巡撫樊繼祖

許之昇麟遂結心腹擒戮首惡黃鎮等九人榮乃開城門延繼祖入復捕斬二十六人錄功擢光祿寺少卿再遷太常少卿二十二年以右僉都御史巡撫甘肅魯迷貢使留甘州者九十餘人總兵官楊信驅以禦寇死者十之一榮言彼以好來而用之鋒鏑失遠人心且示中國弱詔奪信官構死者送之歸番人感悅踰年以大同巡撫趙錦與總兵官周尙文不相能詔榮與錦易任俺答數萬騎入掠榮與尙文破之黑山陽進右副都御史寇復大舉犯中路參將張鳳等陣歿榮與尙文及總督翁萬達嚴兵備陽和而遣騎邀擊多所殺傷寇乃引去代府奉國將軍充灼行剽榮奏奪其祿充灼等結小王子入寇謀據大同榮告尙文捕得皆伏辜榮以大同無險乃築東路邊牆百三十八里堡七墩臺百五十四又以守邊當積粟而近邊弘賜諸堡三十一所延互五百餘里關治之皆膏腴田可數十萬頃乃奏請召軍佃作復其租徭移大同一歲市馬費市牛賦之秋冬則聚而遏寇帝立從焉寇入犯與尙文破之彌陀山斬一部長榮先以靖亂功進兵部右侍郎又以繕邊破敵累被獎賚召還理部事進左尙書趙廷瑞罷榮署部務奏行秋防十事已而萬達入爲尙書遭母喪榮復當署部務辭疾乞休帝怒奪職閒住越二年卒當榮之撫大同也萬達爲總督尙文爲總兵三人皆有才略

寇數入不能得志自後代者不能任寇無歲不入躪邊人益思榮等明年俺荅薄京師萬達榮皆已去論者謂二人在寇未必至此萬曆中榮孫廷爲順天通判上書訟榮功贈工部尙書予卹如制

劉源清

按明外史本傳源清字汝澄東平人正德九年進士授進賢知縣宸濠反源清積薪環室命家人曰事急火吾家一僕逸手刃以殉縣中諸惡少與賊通者悉杖殺之宸濠妃弟婁伯歸上饒募兵源清邀戮之賊檄至立斬其使會餘千知縣馬津龍津驛丞孫天祐亦起兵拒賊賊七殿下者奪運舟於龍津天祐與戰殺數人賊黨募兵過龍津天祐追殺之焚其舟婁氏家衆西下亦爲天祐所遏擒七十餘人賊兵不敢經湖東以窺兩浙者三人力也賊平源清徵爲御史嘉靖改元津亦入爲御史津滁州人終福建副使源清尋遷大理丞謝病歸六年夏以右僉都御史巡撫宣府滴水崖賊郭春據城叛稱王源清遣人遠城呼止擒元惡其黨皆散春等自剄死總兵官卻永虐下劾罷之進副都御史十二年以邊警遷兵部左侍郎總制宣大山西保定諸鎮軍務大同總兵官李瑾浚天城左孤店濠四十里趣工急卒王福勝王保等焚殺瑾因焚巡撫潘倣署倣奏瑾激變宜撫帝命源清同總兵

承討之源清榜令解散而榜言五堡變處之過寬五堡遺孽大懼師次陽和倣等密捕亂卒杖死十餘人繫王保等七十餘人以獻請旋師源清懲昔胡瓚事不欲已以囚屬御史蘇祐囚妄言前總兵朱振失職首亂且多引無辜源清遣參將趙綱入城大索賊城中訛言城且屠亂卒遂鼓譟殺千戶張欽倣等殺數人撫慰之始定振實不反詣源清自明不能自發憤自殺承兵至城下大掠五堡遺孽遂盡反迎戰殺參將曹安官軍亦攻據四關晝夜圍擊亂卒出前參將黃鎮等於獄奉爲帥死守倣與鎮國將軍俊驥等登城止毋攻俊驥出見承請緩兵皆不聽僉事孫允中縋城出言將士貪功妄殺狀源清叱曰汝爲賊游說耶欲囚之允中不敢歸源清因多設邏卒遏王府及有司軍民章疏而請益師至五萬帝命侍郎錢如京都督江桓統京軍八千以往已忽悟罷弗遣專責源清承討賊倣馳疏言將士妄殺激變速旋師亂可已源清亦詆倣媚賊張孚敬主源清侍郎顧鼎臣黃綰言用兵謬帝不能決城圍久大困毀王府及諸廨舍供饔兵部復下安撫令源清亦樹幟招降叛卒稍稍自投首惡黃鎮等亦分日出見乞通樵採路承許諾翌日採薪者出承悉執之城中人益懼亂卒復叛勾外寇爲助承遇之大敗而遁叛卒遂引寇十餘騎入城指代府曰以此爲那顏居那顏者華言